



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁSIU

**Komunikadu Imprensa**  
**27 Setembru 2024**

**Setór saúde iha pontu krítiku maibé Parlamentu Nasionál falla atu  
estabelese Komisaun Inkéritu Parlamentár**

Iha semana hirak ikus ne'e, mosu pro no kontra oioin iha Parlamentu Nasionál kona-ba orsamentu privativu Parlamentu nian atu sosa karreta foun ba deputadu sira, dívida iha ospital estrangeiru no inisiativa atu estabelese Komisaun Inkéritu Parlamentár hodi halo inkéritu parlamentár ba nivel gravidade no kompleksidade problema saúde ne'ebé tama ona iha faze krítiku (kolapsu). Maske nune'e debate ba matéria projektu Komisaun Inkéritu Parlamentár ne'e falla tanba diskusaun no debate sira la orienta ba solusaun maibé orienta polémika, konfuzaun, desentendimentu no interese política partidária husi bankada parlamentár sira.

"JSMP ezije deputadu sira iha Uma Fukun Parlamentu Nasionál ho boa-fé no tane aas interese povu tomak nian hodi buka solusaun ne'ebé própriu no adekuaudu ba problema saúde nasional no problema sosial sira seluk ho onestidade no prudénsia, la'ós aproveita atu fase-liman no duun kulpa ba malu", dehan Sr Casimiro dos Santos, Diretor Executivo Interinu JSMP.

Komportamentu hanesan ne'e politikamente la étiku no la sivilizadu, tanba explora vulnerabilidade povu nian ba interese político. Situasaun saúde ne'ebé tama iha pontu krítiku tebes, tuir loloos Parlamentu Nasionál iha obrigasaun moral atu kria ona Komisaun Eventuál Inkéritu Parlamentár ida hodi halo avaliasaun no apresiasaun ba asuntu ne'e hanesan prevee iha Artigu 36 no 37 Rejimentu Parlamentu nian, maibé Parlamentu simplesmente falla atu kria Komisaun ne'e.

Iha impresaun iha públiku katak setór saúde laiha lideransa ka lakon ona kapasidade lideransa atu identifika setór ka área ne'ebé mak prioridade no urjente atu rezolve no projeta medida no política intervesaun ida ne'ebé konkreta, adekuada no direcionada ba problema hirak ne'e, ne'ebé públiku kestiona durante ne'e.

Ita hotu konsiente katak, proplema saude la'ós de'it pekadu político hosi nuno governu konstitusionál nian, maibé nu'udar responsabilidade kolektiva husi governasaun sira hotu tantu governante anteriór no atuál. Mezmu nune'e, governu atuál tenke assume responsabilidade hodi buka solusaun, la'ós buka dalan terik atu atira kulpa ba governasaun anteriór, no lakon vontade no inisiativa atu buka solusaun.

JSMP rejista katak, diskusaun no debate sira hosi representante povu nina iha PN la projeta solusaun no medida política sira ne'ebé própriu no adekuaudu ba

opsaun alternativa ba problema povu no interesse estadu nian. Maibé iha tendénsia akuza malu, so'e lia ba malu, hakilar malu, no jestu polítika síniku ne'ebé la tuir ona devér deputadu sira-nian ne'ebé hatuur iha provizaun pontu 2) Artigu 10 Rejimentu Parlamentu nian no la hatudu kualidade hanesan membru órgaun soberanu ida ne'ebé hetan lejitimidade hosi povu no reprezenta povu hodi bele foti desizaun polítika ho interesse nasional hodi rezolve problema sira povu no nasaun nian.

Atitude sira ne'e lamentável tebes-tebes, tanba deputadu sira ne'ebé tuur iha Uma Fukun Parlamentu Nasionál aproveita facilidade no rekursu estadu nian atu halo ezersísiu (fera-ulun) hodi buka entendimentu atu rezolve problema povu nian, la'ós ba hakilar malu durante diskusaun sein solusaun ruma. Komportamentu politika hirak ne'e, la saudável ba nasaun no la justu ba povu, ofende tebes konsiénsia públiku nian tanba goja rekursu estadu nian sein fó kontribuisaun ne'e efetivu ba estadu. Ida ne'e violasaun grave ba devér konstitusionál no legál sira deputadu sira nian ne'ebé labele tolera. Povu tenke buka dalan atu kestiona no ezije sira kumpri sira ninia devér sira.

Iha fenomena klásika ne'ebé akontese bebeik iha PN mak bainhira agenda no debate kona-ba subsídiu no ben-estar deputadu sira nian no orsamentu privativu hodi sosa kareta foun ba deputadu sira kuaze la pro-kontra barak, deputadu sira hotu-hotu lian ida de'it ka ho unanimidade, aprova!!! Ne'e hahú husi membru deputadu/a ida-idak to'o líder bankada sira hotu ho firmeza no ho lian maka'as deklara katak la presiza tan debate, aprova kedas ona!

Enkuantu debate sira kona-ba problema saúde, ne'ebé to'o agora iha pontu ida krítiku ona, deputadu sira sei buka atu kria polémika, kria desentendimentu, buka dun kulpa ba malu, buka aranju oioin ho argumentu legalista no prosedurál, nune'e lakon kapasidade nu'udar politiku atu explora opsaun no solusaun alternativa ne'ebé segura no orientadu ba povu nia interesse.

Iha kazu konkreta ida ne'ebé akontese iha PN iha Segunda-feira, 23 Setembru 2024, relasiona ho hanoin no proposta ba kriasaun Komisaun Eventuál Inkéritu Parlamentár ne'ebé apresenta nu'udar solusaun atu avalia problema saúde nasional. Infelizmente proposta ne'e la bele aprova tanba la hetan entendimentu, no deputadu husi bankada ida-idak la hatudu vontade di'ak, atu konsentra ba proposta solusaun maibé buka atu kria mak konfuzo, polémika, no rejeisaun tanba razaun politika atu defende ida-idak ninia bankada no governasaun.

Ministra Saúde nu'udar responsável másimu iha setór saúde la hatudu lideransa atu brani halo diálogu ho deputadu sira ka entidade sira hodi projeta solusaun ba problema saúde ne'ebé krítiku no kolapsu dadaun ona. JSMP husu ba bankada governu atu kolabora hodi buka solusaun inklui, konvense Ministra Saúde atu hatan ba konvite PN hodi partisipa iha plenária no buka solusaun ba problema ne'e.

JSMP hein katak sidadaun hotu-hotu tenke proativu atu akompañia dinámika sira iha Uma Fukun Parlamentu Nasionál, konsolida estratejia no forsa atu oinsa ezije entidade no orgaun soberanu sira ezerse sira ninia knaar ho responsável,

maduru, prudénsia, no partikularmente tenke iha sensibilidade ba povu ninia situasaun atuál.

Atu hetan informasaun kompletu favor kontaktu:

Casimiro dos Santos  
Diretor Ezekutiva Interino JSMP  
Diresaun e-mail: [casimiro@jsmp.tl](mailto:casimiro@jsmp.tl)  
Telefone: (+670) 33238883 |  
Website: <https://jsmp.tl>  
[info@jsmp.tl](mailto:info@jsmp.tl)